

# CUSSEGL GROND

Sessiun d'avust 2023

## Incumbensa Rettich concernent l'examinaziun dal concept da Housing First

La politica svizra da drogas sa basa sin quatter pitgas, numnadamain la prevenziun, che duai gidar a prevegnir a problems, la terapia, che duai gidar las personas a schliar problems, la repressiun, cun la quala fauss cumportaments vegnan chastiad, sco er la diminuziun da donns, che duai gidar ad impedir suffrientschas. Ils ultims onns è la scena da drogas a Cuira sa sviluppada cleramain en moda negativa, ed il dumber da personas senza tetg è creschì. Las relaziuns n'en acceptablas ni per las personas pertutgadas ni per la populaziun.

Housing first è in concept che vul cumbatter la perdita dal sottetg. Cuntrari als concepts da sustegn actuals usitads metta Housing First a disposiziun spazi d'abitar a personas vulnerablas che han pers lur sottetg, e quai senza far cundiziuns. La concessiun da spazi d'abitar n'è pia betg liada vi da la premissa d'ina participaziun a purschidas d'assistenza, da terapia u da structures dal di. La concessiun da spazi d'abitar n'è per exempel er betg liada vi da la cundiziun da s'abstegnair da drogas. Il concept da Housing First parta dal fatg, ch'in dachasa segir è la basa per che umans arrivian en la situaziun da pudair prender per mauns auters problems, e per che la situaziun da vita possia uschia sa stabilisar tut en tut a lunga vista. En Finlanda è Housing First per exempel vegnì introducì vastamain dapi l'onn 2008. Cuntrari ad auters pajais europeics èsi uschia reussì a la Finlanda da reducir cuntinuadamain il dumber da personas senza tetg. Quatter da tschintg personas senza tetg han pudì salvar lur abitaziun durant in lung temp ed han chattà la via en in vita stabila. Plinavant ha Housing First er purtà avantatgs finanzials per la publicità: Ins ha stuì investir damain daners per personas che han pers lur sottetg (tranter auter polizia, sanadad e giustia) e per las consequenzas respectivas. En Svizra vegn il concept da Housing First già realisà en diversas citads (p.ex. Basilea-Citad, Soloturn). Autras citads han acceptà intervenziuns politicas tar quest tema (p.ex. Turitg e Berna).

En il Grischun è la situaziun oz displaschai vlamain savens uschia, che personas, che han per exempel commess delicts liads a l'acquisiziun da drogas, vegnan messas en praschun, nua ch'ellas vegnan sutmessas automaticamain ad ina dischintoxicaziun. Suenter la dimora en praschun na chattan las personas pertutgadas (pervia da l'attestat da conduita) strusch in'abitaziun. Quai difficultescha l'entrada en il mund da lavur e maina savens enavos las personas pertutgadas en l'ambient engrevgià. Uschia fineschan las personas per regla puspè en la dependenza da drogas. Ins po quasi observar in effect da porta girabla, che pudess vegnir surmuntà grazia al concept da Housing First.

En ils rapports ch'il chantun Grischun ha laschà elavurar dad Infodrog sco er dal Lavuratori da management davart la politica da dependenzas, èsi vegnì renvià al Housing First. La Regenza ha medemamain confermà l'onn passà en il Cussegl grond, ch'ella fetschia ponderaziuns en direzziun dal concept da Housing First.

Per prender per mauns en moda cumplexsiva la situaziun problematica da las personas fermamain dependentas en il chantun, ch'è vegnida tematisada gia pliras giadas en il parlament, supplitgeschan las sutsegnadras ed ils sutsegnaders la Regenza d'examinar il concept da Housing First en il chantun Grischun e da suttemetter al Cussegl grond ina preschentaziun generala per realisar il concept.

Cuira, ils 2 da settember 2023

**Rettich**, Danuser (Cuira), Holzinger-Loretz, Atanes, Bachmann, Bardill, Baselgia, Bergamin, Biert, Bischof, Bisculm Jörg, Bleuler-Jenny, Cahenzli-Philipp, Degiacomi, Dietrich, Gartmann-Albin, Gredig, Hoch, Kaiser, Kreiliger, Luzio, Mazzetta, Müller, Nicolay, Perl, Preisig, Rageth, Rusch Nigg, Rutishauser, Said Bucher, Saratz Cazin, Thür-Suter, von Ballmoos, Walser, Wilhelm